



Fasnacht 2010

Sujet: **Laufte rund... oder nit?**

S' Prattler Fasnachtssujet „mir wai hoch uuse“  
finde mir glunge und nit zum gruuse  
denn es zeigt d' Richtig vo eusem Komitee a  
so dass an dr Fasnacht wieder me laufe cha...

Au mir händ sujetmässig e Richtig gwählt  
öbis wo eus beschäftigt und zimlig quält  
nit hoch uuse do hämer kei Grund  
sondern im Kreis... das heisst in demfall **rund**  
den euses Sujet: **Laufte rund... oder nit?**  
finde mir Dorfplatzrueche e **rundi** Sach und dr Hit

Was isch nit alles **rund** uf dere Wält?  
Bierdeckel, Räder, Bäll und au Gäld  
Auge, Buchnäbel me chönnt no einigi Sache sage  
sogar Männer wo vor sich e **runde** Ranze umetrage  
aber all das isch nit an dass wo mir danke  
s' isch das wo dr Verkehr soll besser länke  
jo genau es isch nit d' Inge Meisel  
sondern dr Wahnsinn mit dene viele Kreisel

Agfange het' s mitem Kreisel bi dr Pfirter Hütte  
denn hät me bim Aquabasilea eine agfange aneschütte  
und das isch jo nit im Dorf sondern duss  
drum macht me grad Zwei so für de Gnuss

Dr neuscht Kreisel rein informativ  
isch de zur Autobahn definitiv  
mir wüsse wer sich tuet am meischte freue  
dr Strübin will jetzt gseht me sini Auto... die Neue,  
numme was me in Kreisel soll inne setze  
do het me sich bim baue nit lo hetze  
drum isch in dr Mitti, eus stört das sehr

nüt drin usser Luft, so kahl und leer  
euse Vorschlag isch de nit geil  
machtet doch dört inne es riese Rittiseil

Wer jetzt glaubt dr Kreiselwahn het es Änd  
für de hämer no en Trumpf in de Händ  
will Prattele das isch kei Witz  
bechunnt dr gröscht Kreisel vo dr Nordwestschwii  
die mega Baustell hämer gfunde  
dört Richtig Liestel in dr Hülftede

Zum Thema **rund** so hämer verno  
händ mir Dorfplatzrueche schiints eusi Idee chlaue lo  
oder anderscht gsait isch das famos  
s' Basler Komitee isch Ideelos  
drum händs wege eus isch das nit fräch  
ihres Sujet : "e **rundi** Sach"

Ebefalls **laufts rund... oder nit?**  
bim Aquabasilea diä si scho wit  
händ zwar e mega stress und bange  
obs ächt uf d Eröffnig wird lange  
s' het dört jo scho **rund** agfange so het mers erkennt  
wills nach wenige Wuche bereits ufem Dach scho het brennt

Rund laufts schiints au... ohni Scherz  
das chunnt nit vo eus dass sait dr Merz  
mitem Gadaffi und em Geiseldrama  
das goht jo vorwärts wie es hinkends Lama  
drum Herr Merz e ehrliche Antwort das wer eusi Bitt  
**Laufts** wüerkli **rund... oder** eher **nit?**

S' **lauft rund... oder nit?**  
au dr FCB mischlet wieder vorne mit  
grad s' Gegeteil bim FCP  
die findisch uf de Ranglische niene meh  
wer hätti das afangs Saison chönne aane  
naja gli müesse si für d' 3. Liga plane  
sind leider das Joor nit so fit  
drum d' Frog : **Laufts rund... oder nit?**

Jetzt schliesst sich dr Kreis dr Zettel isch beändet  
und mir händ die letschte Reim verwändet  
machtet Alli toll an dr Fasnacht mit  
den müesse mir nit froge: **Laufts rund... oder nit?**  
Mir wärdes uf jede Fall versueche  
e schöni **rundi** Fasnacht euri Dorfplatzrueche